



16. august 2012

UKA 2012/153

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq saqqummiuppara:

Aalisartut Piniartullu Kattuffiata KNAPK-p atuisutut ilisimasaasa tamakkiisumik naligiissineqarlutillu Pinnngortitaleriffiup ilisimatuussutsimik aallaaveqartumik Naalakkersuisunut pisassiissutinik siunnersuineramik suliaqarneratulli pisortatigoortumik toqqammavigineqartalernissaanik Naalakkersuisut peqquneqarnissaannik inatsisartut aalajangiiffigisassaattut siunnersuut.

(Inatsisartunut ilaasortaqaq Aleqa Hammond, Siumut)

Tunngvilersuut:

Siumup anguniartuarpaanunatta aningaasatigut imminut napatilernissaa aammalu tapiissutinik pingitsuisinnaasunngorluni ingerlanissaa. Tamannalu angutserlugu Siumup siunnersuutigaa aalisarnikkut aammalu piniakkatigut ingerlatsineq ullumikkunnut ilisimasanik tunngaveqarnerusumik aallaaveqartumik aaliangersaasoqartalissasoq.

Ukiorpanngortuni tamatta ilisimavarput pisassiissutissat Naalakkersuisuni saqqummiunneqartillugit aalisartut piniartut taakkualu tunuliaqutaasa qisuariaateqarnermikkut peqassuseq pillugu isumaqatigiinngittarnerit aammalu akerleriittarnerit.

Ullumikkut periuserineqartoq ataatsimoornermik kinguneqarneq ajorpoq. Pinnngortitaleriffiup aalisartut piniartullu pisassaattut innersuussutai Naalakkersuisunit aalajangiiffigineqartussanngorlugit saqqummiunneqartarput. Aalisartut piniartullu qanoq atugassaqaqarumarlutik tusagassutititut nalaatsornikkullusooq tusartarpaat, taakkumi innersuussutinik suliaqarnermi akuutinneqarneq ajorput. Taamatut periuseqarneq illuatungeriinnik avissaartuutsisuuvoq, tamatumalu kinguneranik illuatungeriit peqassutsip qanoq annertutiginera pillugu assigiinngitsunik isumaqartarput. Pissutsit taakku qaangerumallugit Siumup aalajangiiffigisassatut siunnersuut manna saqqummiuppara.

Siunissami ataatsimut paaseqatigiilluni ilisimatuut atuisullu ilisimasaanik paaseqatigiiffiusumik, aqutsisoqarfanni pisassiissutinik aalajangiiffiginerni piffissamut qanittumut pisassiissutinik kiisalu piffissamut sivilunerusumut isigisunik naligiimmi suleqatigiilluni pisassiissutinik aalajangersaalernissaq Siumut aqutissiukkumavaa.

Maannakkut Pinnngortitaleriffiup paasisani aallaavigalugit pisassiissutissanik innersuussinermi pisussaaffiginngilaa aalisartut piniartullu taakkualu tunuliaqutaasa ilisimasai nalilersuutitut aammalu isummerniarnermi tunngavigineqartussatut atussallugit, tamannalu kinguneqartarpoq illuatungaannarsortumik ilisimasalinnik aallaaveqartumik naliliineq. Biologit ilsimasaannik apeqqusiinerunngilaq siunnersuut manna kisiannili siunertaavoq ilisimasallit tamarmik tassalu biologit aammalu atuisut susassareqatigiit ataatsimoorumik naligiimmik ilisimasaat katersuutaasumik ataatsimoorumillu nalilersorneqaaqqaartumik pereeraangata aatsaat pisassat annertussusissaat Naalakkersuisunut innersuussutigineqartalissasut siunnersuutigaarput, taamaasiornikkut aqut tamat

oqartussaaffiannik ataqqinnittoq aammalu tamat sunniuteqarfigisinnaasaannik tunngaveqartut atutilersinneqassasoq ilisimagatsigu.

Aalisarneq pillugu siunnersuisoqatigiit Piniarnermullu Siunnersuisoqatigiit ullumikkut taamatut pisussaaffeqartinneqannginnerat ersarippoq. Naalakkersuisut Pinngortitaleriffimmit peqasseq pillugu siunnersuutit aallaavigalugit aalajangiinnginneranni Aalisartut piniartullu ilisimasaat aalajangiiniarnermi ilaatinneqatassapput. Taamaammat illuatungeriit imminut ilisimateqatigiittarnissaat siunnersuutitta siunertaraa, tassa Pinngortitalerifiik KNAPK-lu ataatsimoorlutik peqassutsimik, aalisarfinnik, ilisimasani il.il., aalisartut piniartullu kattuffiisa qulliunerusuni aalajangiiniarnermi aamma atorneqarfigisaanni kikkut tamarmik innersuussunik suleqatigiilluni suliarineqartunik piginnittut/piginneqataasutut misigisimasinnaaqqullugit, tamatumalu atuisut isumaat ilisimasaallu pisassat ataasiakkaat annertussusaasa aalajangiivigineqarnerannut atatillugu aallaaviit ilaattut atorneqartaleqqullugit.

Tamatta nungusaataangitsumik pisassaqaarnissaq soqutigisaraarput aammalu tamatta pisussaaffeqarpugut tamanna tunngavigalugu sulissalluta, taamaattumik paasisimasat ilisimasallu ataatsimoortumik siunnerfeqartumik ingerlatsinissamut aqutissiuussivugut qulakkeerumallugu siunissami peqassutsimut ilisimasallit tamarmik isummersoqataasarnissaannik aqutissiuussinnaasut nukiit tamaasa atorummallugit.

Siumup neriutigaa partiit tamarmiusut siunissamut aalisarnermik aammalu piniarnermik inuussutissarsiuteqartortatta peqataaffigisaannik aammalu sunniuteqarfigisinnaasaannik aaqqiissuteqarnernissamut siunnersuutitsinnut ammaffiginnillutik oqaaseqarumaassasut aammalu ataatsimiititaliami suleqatigiumannissuteqarlutik piumassuseqarumaassasut.

Pisortanut aningaasatigut allaffissornikkullu kinguneqaatit:

Siunnersuut Namminersorlutik Oqartussanut Pinngortitaleriffimmulluunniit annertuumik allaffissornikkut aningaasatigulluunniit kinguneqaateassasutut isigineqanngilaq, piffimmimi ilisimasat nunatsinnilu inuttaaqatigiinnik oqaloqatiginnitarneq Pinngortitaleriffiup anguniagaanut suliaasaanullu atatillugu ilisimatusarnermik suliaqarnermi ilaareemat.

Inatsisisinik allanngortitsinermi allaffissornikkut isumalluutit atorneqarnissaat pisariaqassaaq, taakkulu AC-mik ilinniagalip ukiumut sulineranit pingjorarterummik annerunnginnissaat naatsorsuutigineqanngilaq. Taakku aningaasaliissutaareersut iluanni isumagineqarsinnaasutut ilimagineqarput.

Namminersorlutik inuussutissarsiortunut aningaasatigut allaffissornikkullu kinguneqaatit:

Aalisartut piniartullu kattuffii pisassiisarnermut atatillugu sunniuteqalerlutillu akisussaaqataalernissaat siunnersuutip kingunerissavaa. Assersuutigalugu KNAPK Naalakkersuisunik Pinngortitaleriffimillu qaninnerusumik suleqatigininissamut atatillugu allaffissornikkut isumalluutininik amerlanerusunik atuisariaqassaaq.

Innuttaasunut aningaasatigut allaffissornikkullu kinguneqaatit:

Siunnersuutip piviusunngortinnera innuttaasunut aningaasatigut allaffissornikkullu ajorseriaateqartitsissanngilaq.